

蒙

齋

集

蒙齋集

蒙齋集卷十七

宋

袁

甫

撰

祭文

三衢祭清獻趙公祝文

凡守茲土歲拜祠宇予未施敬人仰標樂廬慕勞止孝  
弟旌里立朝抗論鐵面御史帥蜀言歸琴鶴自隨豈伊  
求名忠誠匪欺洎秉政機新法力排年未七十退老高  
齋世俗茫茫慾焉得剛偉歟我公玉潔日光我希高躅  
惟日不足矧是後人可貽我辱我修泮水延公孫子漸

之摩之風流是似春風融融淑氣沖沖吉蠲蘋藻敬告  
我公我公精神千載常新想聞斯言心兮欣欣

自鳴山廟祈晴祝文

於赫神靈天地同大有禱必應下民依賴季夏霖潦瓣  
香端拜俄頃之間天日開霽邦人僉言精神默契夫何  
旬浹雨復爲沴城闈居民匪舟莫濟莽爲平川厥菑不  
細大田多稼垂成欲壞雨聲稍歇民猶少慰一聞簷溜  
憂窘無奈吏之不德獲罪上帝致此譴怒民則何罪痛  
心疾首曷救斯敗惟依明神一誠昭對陰氛盡掃霖霖

勿再積水歸壑室廬無害農保有秋奄觀銍艾無聊之  
情一朝舒泰歸功有自實神之賜祖廟離宮鳩工靡怠  
匪伊爲報民心攸繫神鑒斯言出由肝肺

自鳴山廟告修造祝文

惟神孝誠上通于天傳之萬古孝德章矣饒州行祠民  
倚爲命而門廡卑湫未稱主祀至者憊焉某將指此來  
水旱盜賊必禱必應則嚴廟貌以報神休以益顯夫出  
雲雨禦菑患之靈以宏庇乎此邦之人庸敢後乎夫得  
人之歡心以事神亦所以助神廣孝于天下也將以吉

日乙亥撤門廡而更新焉人心載喜神其聽之

自鳴山祖殿修造祝文

於赫神靈廟食百世庇此下民天覆地載我行其野禾  
麥茂遂父老頂禮拜王大賜王之至仁厥有根柢孰爲  
之根篤孝于親維此孝心通天地人視彼有生與吾親  
均王推此孝發育如春廟貌孔嚴安可弗新吏失其職  
頽垣敗壁某拜祠下心焉跼踖撤而新之宜尸此責妥  
王之靈爲民祈福昭示仁孝永永無極

江東謁諸廟祝文

國之所恃者民民之所恃者神事神治民吏之職也某  
將指此來深惟一道司臬責重任難凜凜焉思所以稱  
厥職公清以爲本勤敏以行之此心無愧無忤則庶可  
以事神治民矣祇謁之初矢心以告

番禺五賢祠祝文

謹以酒果之奠敢昭告于文忠顏公文正范公詹事王  
公忠宣洪公忠定趙公世有偉人吾道棟梁惟顏惟范  
唐宋相望鑿鑿其實炯炯其光百代聞風首俛心降梅  
溪王公景行前哲凜然清標同一軌轍忠宣之節忠定

之烈照映今古俱稱人傑嗟哉晚生不見典型憫俗之  
頽涕淚交橫祇拜五賢想像芳馨夙興夜寐兢兢奉行

諸廟謝晴文

勾芒司旦土膏旣興陵陂之麥鬱乎青青積陰未解霖  
雨其零浸畦溢壟溝澮皆盈民以病告有禱于神曾未  
徹奠雲開晦明瞳矐曉日赫然東昇匪神之休孰赫厥  
靈巫祝矯舉吏實何稱神降之福以答民誠

自鳴山廟謝晴文

血食溪上惟神孔靈千載一日凜凜猶生水旱有求如

響應聲今茲淫雨巨浸日增害我嘉禾甚于騰螟睠惟  
東江歲比不登饑者相望殍者相仍予吏茲土職兼常  
平豈不救荒惠止斗升惕然內愧所望秋成芄芃其稼  
百室可盈垂成而壞易喜而驚爲民告哀遣官代行冀  
神之聽痛鑒此情層陰蕩空曉色舒晴多黍多稌如坻  
如京吏責寬釋民歌沸騰則神之賜丘山猶輕歸然祠  
宇豈無壞傾捐我薄費是經是營豈以爲報聊竭此誠  
此誠無盡通貫幽明

自鳴山廟祝文

某惟勲盛者報必隆實大者名必赫番江之民王父母  
之番江之水王指麾之浹旬以前敬禱祠下陰霾頓掃  
晴日麗空遐邇耄倪莫不呼舞非所謂實大勲盛者乎  
某雖無狀心與王通其禱也固曰當力請于朝增崇封  
爵斯言一出金石不渝累日討求申藁已具繕寫一通  
告于王前庸致隆報以赫厥名此某之所以踐前言也  
惟王神功廣大陰相默佑使水之未盡退者速歸其壑  
民之尚沾危者速奠厥居一道之民咸曰聖哉吾王不  
其休歟因謝有所寸衷甚切惟王其鑒之

初建書院告陸象山先生文

先生之精神其在何所耶在金溪之故廬優游而容與  
耶在象山之精舍言言而語語耶抑周流乎上下四方  
與天地游與四時序耶某將指東江志興正學山之旁  
近爰咨爰度得勝境于徐巖離家山而非邈三山環峙  
兮高可仰大溪橫陳兮清可濯殆天造而地設匪人謀  
之攸作是可以宅先生之精神振先生之木鐸或曰建  
象山之書院當于象山之故址而又焉可改也是求先  
生于形迹而未知先生之精神無在無不在也先生之

道精一匪二揭本心以示人此學問之大致嗣先生之遺響警一世之聾瞶平易切近明白光粹至今讀其遺書人人識我良貴由仁義行與行仁義者昭昭乎易判也集義所生與義襲取者截截乎不亂也宇宙內事卽已分內事渾渾乎本一貫也議論一途樸實一途極天下之能言者斯言不可贊也嗚呼先生之學如此先生之精神如此然則在金溪之故廬者如此在象山之精舍者如此周流乎上下四方者亦如此誰謂徐巖而獨非此耶工役俶興禮宜虔告先生精神淵淵浩浩

祭陸象山先生文

先生之學得諸孟子我之本心光明如此未識本心如雲翳日旣識本心元無一物先生立言本末具備不墮一偏萬物無蔽書院肇建躬致一奠可見可聞非聞非見

先師堯國公祝文

先師道德難可名狀元氣融融春風益益舜何人哉當仁不讓奮此大勇一何其壯顓蒙小子學焉勉強慕先師之屢空一言而蔽之曰平平蕩蕩

家齋集 卷之二 祭文 祭東塾先生祠堂祝文

洙泗闢教萬世同尊漢唐榛蕪陋儒實繁我朝諸老發  
揮微言肆我先公體道之元推以淑人訓語温温光明  
本有意動而昏昏去明復照耀乾坤四海歸慕絜齋之  
門矧伊一家昆弟子孫爰及甥輩罔間藩垣祠宇告成  
德容如存肇開東塾晝夜講論某未知學膚淺無根願  
與同志唱和箴垣如彼鳳凰千仞高騫如彼滄溟百川  
竝奔學要如是洞澈心源佩服終身罔極之恩

祭史衛士文

師王之生數關乎天惟福惟量其大無邊問王之福得  
君甚專幹旋元化獨秉大權始終無二凡三十年其間  
變故何翅百千蒙疑履危雍容周旋固守矩方隨機規  
圓無竭泉流不動石堅偉哉元勛洗日虞淵恭己委政  
倚王之賢王雖臥疾寵數蟬聯再世王爵自昔莫先生  
榮死哀孫子縣縣福萃一門舉茲以旃問王之量翁受  
羣言我所身嘗知王裕然官雖疏逖有言必宣皇都鬱  
攸物情喧喧我忠于王飛奏君前亟解機務君臣道全  
彗星謫見流言愈傳我忠于王再騰奏篇亟逃天譴室



欲之原茲誠苦口誰謂我妍王量如海百川赴焉不舉  
我言察我心田心乎忠愛匪事佞便感王知己實維勤  
拳聞王之薨職守攸牽緘辭寫悲心旌翩翩

祭拙堂致政韓公文

惟天不輕畀人兮壽爲九五福之首皓首朱顏婆娑林  
下兮信人間之稀有集茲福于厥躬兮又回顧夫我後  
後人命懸于天兮孰豫知肯堂與否偉韓公之獨稟于  
天兮蓋積善之素厚森堦除之蘭玉兮何弟恭而兄友  
歲在癸未兮二子雙綰乎藍綬耿名門之輝光兮譽喧

騰乎萬口咸謂儒家氣味不比北平之有子兮鸞鵠停  
峙足以傳諸不朽我未瞻公之典型兮先于長嗣焉定  
交體質金玉兮義理薰陶一見傾蓋兮延誨兒曹我仕  
大江之東兮又王事之相遭長嗣迎公以來兮兩臉有  
似乎蟠桃遂升堂以展敬兮情誼奚翅乎漆膠次嗣詞  
學之競爽兮瀉萬斛之波濤羌墳簾之迭和兮暢一翁  
之逍遙龍賓兮相邀濁酒兮山肴此樂何極兮知不知  
吾常囂囂人謂公才兮少時勇決遇事敢爲兮志意彌  
烈晚年名堂以拙兮心如石鐵斂鋒鏑于不用兮撓萬

變而不折陋流俗之鍥薄兮遵道德之軌轍寧安己之  
分義兮奚顧彼炙手之可熱倚長松以嘯詠兮凜清風  
之高潔此吾拙堂之所賦兮昔公一覽而擊節謂知予  
心兮勝予自說次嗣通籍兮慶事不絕長入朝路兮出  
分風月天子有詔兮峻奉常之班列將整裝而上征兮  
胡爲乎求醫問藥而中輟嗚呼歲幾兩周兮拙翁言別  
每問訊兮憂心惓惓忽訃聞兮使我悲噎有子可託兮  
孫枝芽茁死生晝夜兮達人一瞥拙翁何憾兮茲理洞  
徹身有時而盡兮光明亘萬古而不滅到此乃知拙翁

之作計兮今而後其計非拙靈乎有知諒我遠而不遑  
奔慟寓誠一卮千里對面其歆我詞

祭程提刑文

立身大節出處行藏固守命義其道乃光猗歟程公温  
温春陽孰識其奧外柔中剛好善如渴汲汲皇皇覩彼  
不善真若探湯鳴弦懷玉厥聞孔揚事苟利民勇孰可  
當民曰父母遺愛甘棠夙駕箴篋來我鄮鄉不爲勢屈  
守道之常清湘布政肯遜龔黃政最旣聞使節熒煌奈  
彼妒賢巧言如簧公心坦坦不動毫芒從此賦歸脫屣

軒裳清斯濯纓志在滄浪我初識公謂我循良未知其  
學義理昭章我來東江篤節是將部有賢僚實公令郎  
辟宰番邑井井紀綱公時就養訓之義方公每語我喜  
色洋洋吾兒知學溫習靡忘願使此兒志氣日彊公與  
我別凡幾星霜終始一心道義是夔捐世俗累留晚節  
香聞公抱病我心已傷俄已訃至今我涕滂嗚呼哀哉  
誰能知公疾惡剛腸雖老猶壯以禮自防索我大書中  
庸名堂爰及諸齋區處精詳將淑生徒正學是倡推此  
規模浩不可量胡然一疾失孤鳳凰慨念平生一往括

蒼病實尼之躬莫未遑姑寫我心千里一觴幸哉有子  
世繼芬芳公亦何憾雖死不亡

誌銘

孫君墓誌銘

余友人胡牧之遺余書曰吾學子有孫震者其先人功  
甫以嘉定辛未十有一月丁巳卒享年四十有八將以  
乙酉歲十有二月壬寅葬于俞山之原功甫居天台閩  
風挹山川秀爽有異質美髭髯意氣恢疎而篤于孝友  
昆弟六人功甫于次爲四親旣歿凡室廬田產器物聽

伯仲所自取功甫不以介意好買書延良師以教子授孟氏天爵人爵之語亶亶訓誘不勸臨終戒諸子力學家事一不掛口故其子築館所居之西偏扁曰綠猗以盡琢磨之義先志也功甫不得志于時家庭事業大槩若此子其序且銘之余歎世降俗薄較錙銖之利忘同氣之親遺子以贏金而不淑以詩書何如其知也識度如孫君而可無述乎君諱九叙功甫字也曾大父皓大父闔父璿妣張氏娶四明奉川胡氏子男三長卽震也次雱寔女一適四明進士王劭孫男五恢孫愷孫悌孫

怡孫忻孫孫女一銘曰行修于家是亦爲政我刻銘詩後人興敬

伍府君墓誌銘

余求友于四方見有質茂美而志恢張者心甚敬焉謁來柯山得友曰伍清之挹其貌莊而和聽其言平而實攷其行鄉閭稱爲佳士叩其志沛乎勇決而莫之禦也嗚呼是余所謂質茂美而志恢張者耶是其門戶當興而然耶一日清之泣請于余曰不肖孤將以九月甲申奉先考柩葬于東山之麓惟是德銘未立敬敘先世梗

概敢頓首以請余覽之拱曰積善之家也是宜有後按  
伍氏之先本楚人自英烈以存吳著偉節歿爲明神大  
江以南往往立廟祀之子孫散處吳楚閩越閩漢晉迄  
唐代有可錄攷國朝登科記題名餘五十人在臨汀者  
獨盛而占籍于衢者猶未著也君諱總字子壽世爲西  
安人曾祖熹醇厚有古人風家雄于財然喜施與貲貸  
者率折券曰積而能散義也祖佚考機俱以善人稱退  
然自守與物無競然生理視舊則不復振矣君奮自植  
立竭力以奉甘旨與人交篤于信義然耿介不苟合門

無雜賓尤以教子爲急家務靡密躬自任之不以累諸  
子聞四方有明師良友亟使就正焉已而清之預鄉書  
入太學歲率再歸歸必止之又三年補內舍生君遺以  
書且舉山谷詩但得新年勝舊年卽如常在郎罷前曰  
專而學業孝莫大焉以是清之得一意于學嘉定十有  
六年清之擢奉常第歸拜膝下教忠之訓訖不離口時  
雙親在堂綵衣團樂其樂無涯越二年而皇考歿又明  
年妣蘧氏歿積憂熏心號慟成疾六閱月而終寶慶二  
年四月二十有八日也壽纔五十有二娶王氏子三人

長維寅修職郎新衡州司戶參軍清之也次維新後其叔麟孺維允先卒孫三人源孫還孫聞孫銘曰人誰不死而君有子人誰無子而子令只東山之陽吉人之藏子孫緜緜伍氏其昌

危君墓誌銘

嘉定丙子余官金陵與臨川危君諱和字應祥相好也後十年余守柯山應祥自中都過余與譚名理心若有契不知余識進耶應祥學進耶應祥主上元簿會府人物林藪挾才能爭取上官知面嬉笑胸戈戟應祥深藏

若虛諸公器重之不挾書覓舉舉反先儕輩歲大禋招糴旁郡走川陸不告勞受輸務寬民不希意取贏攝校官士循規矩參鞫獄人稱無冤漕檄同官慮囚府亦屬以事莫知適從垂獲譴應祥勇不顧白漕請代行有識義之就辟帥幕悉忠長官無巨細必啓告敵人來侵羽檄交馳制帥挽應祥參畫以書生不知兵辭始終金陵六七年迄免譏謗簿舍明道先生舊游應祥憫正學湮蕪大闢祠宇廣養士員西山真公偉是舉也爲記其事改秩宰饒之德興值歲歉先諸邑條賑卹不待部使者

迫之然後從事民賴以活諸所施行皆此類處閨門莊而不矯睦宗族恩而有義事關風教力持之不變居官以廉潔稱還里飯不足澹如也取陶靖節語自號閒靜居士應祥十年間涉歷蓋如此訪我柯山風霜飽矣杖葉落矣方期晚節共進此道嗟乎胡奪之速應祥登乙丑進士科歷階至奉議郎自德興丁內艱再調隆興之南昌未至官而卒實紹定己丑八月丙辰也享年六十有四曾祖嶺祖能父必強贈承事郎母陳氏繼許氏俱贈孺人娶羅氏封孺人子男三人璫先君三月卒琛瑀

業進士女三人長適鄉貢進士李廷龍次適從事郎常德府龍陽縣尉趙稅夫次適將仕郎趙必撫孫男四人孫女一人曾孫女一人始應祥築書堂于臨川東鄉之蟾塘風景清曠環以脩竹讀書竟日超然忘世平生著述有集若干卷藏于家應祥既歿葬未得卜一夕見夢其孤曰書堂卽其地也尙何求琛等遂以某年月日奉君之柩窆焉謂余知君琛泣請銘銘曰言依乎是行逃乎毀不亢不媚孰信信已生兮書囊藏兮書堂餘韻琅琅世載其芳

江夫人巢氏墓誌銘

余持節江左志興學校郡博士各思振職而秋浦校官  
江子遠尤奮發帥先余固多子遠而未知家風之自也  
一日子遠奉親命持祖妣夫人巢氏言行一編拜且泣  
請余銘余覽之藹然有古賢妃淑女風子遠才固高然  
玉于成者夫人教也子遠推家庭之教教庠序士士咸  
知興起子遠益自勵不使才勝德則夫人之教入之深  
矣乃序次大略惟巢氏自尙之仕劉宋嘗守新安繇新  
安還建業舟過東匯愛其江山卜居焉遂爲南康都昌

人至國朝熙寧間有名谷者仕蜀與東坡兄弟友東坡  
謫嶺海谷訪之握手道平生歡世服其高誼曾祖諱自  
牧祖諱勉父諱紹椿自號無我居士雅以先世風  
誼爲法自拔流俗一女憐之擇對惟謹知江君諱某端  
厚長者歸焉夫人生于紹興乙丑之十月終于紹定辛  
卯之七月壽八十有六兩遇恩封太安人將以某年某  
月某日葬于縣之新城鄉伏牛山之右麓六男子煜輝  
熿炎榮華皆業進士熿丙戌奏名調峽州宜都尉四女  
俱嫁爲士人妻孫男十人日新九萬萬里又新自新萬



頃萬盈萬全萬齡萬善九萬太學生萬里太學上舍生  
丙戌進士及第子遠也夫人相夫子以禮春秋祀事必  
潔必誠闔門千指耄稚尊幼醇類靜躁不齊夫人調適  
其間略無長短憎愛語猶子或謂聚族久生產作業寢  
廢不若各有歸夫人愀然不樂曰此外物耳我奚較顧  
爾曹妙年盍力學光啓我門戶奈何以瑣瑣嬰心聞者  
悚服久之不欲拂衆則聽各以意取人人慰滿遇人有  
恩意婢妾有過怒不形辭色歲惡食艱雖居約推以食  
人嘗買二羊備姻禮一夕盜取去有告者盜聞亟伏辜

請償夫人曰是爲饑所驅奚可責償好言諭遣之盜大  
感悟性節儉經時不製一新衣不以一錢供耳目玩至  
延師家塾傾囊篋無吝色諸孫滿前聽迺祖講論孟中  
庸大學夫人默記要語時時申戒俾勿忘每教爲人婦  
者孝而婉教爲人妻者柔而正出語有典則宿學莫過  
也嗟乎是所謂有德者耶克登上壽子孫衆多多而又  
賢非德之驗耶余謂子遠家風有自非虛語也是宜銘  
銘曰維壽母兮美無度家不裕兮德則裕維此德美流  
慶曷已何以占之視其孫子

胡君墓誌銘

君諱誼字正之其先苕霅人五季避地徙丹丘後徙明之奉川曾祖裔祖仁考宗彝俱不仕妣王氏正之生于紹興己卯歿于紹定壬辰壽七十有四娶陳氏繼任氏先正之三年卒男三明鎮明璧明奎皆習儒女一適進士袁潤孫男二守成守本女一將以癸巳冬十月甲申葬于松林鄉銅山之原明璧持其叔父收之所敘言行泣請銘余爲童子時見學徒負笈從先君子游常百數正之骨清神靜筆端洒洒無俗氣先君子尤愛之曰修

謹士也自以不與時偶益讀古聖哲書深求旨趣以自暢適晚歲建聚書樓扁曰觀省自號觀省佚翁且作記曰青嶂當前翠竿在側展卷與聖賢對語優哉游哉又述先君子之訓曰修身爲本謹行爲先觀于斯省于斯子子孫孫寶之永無忘正之歿半歲一夕見夢明璧汝其卜吉于冬以葬我亟走江東乞銘且持觀省樓記求跋于吏部吏部余兄也時謁告省松楸正之何自知之噫死生如一是真能觀省者耶古人云斃而後已正之雖亡觀省尚不已耶先君子以絮名齋每日安貧樂道

家齋集 卷之七 谷際岐校  
是謂潔白不遇而富貴汙莫甚焉正之老于韋布乃能  
服膺師訓觀省此心死而不忘是宜銘銘曰癯儒精神  
樂哉一貧是為絜齋先生之弟子不辱師門

甘氏夫人墓誌銘

余聞南安邑大夫徐君德夫之賢舊矣嘉熙改元余與  
德夫同朝一日袖母夫人行實泣請銘余讀之歎曰嗚  
呼非此母不生此子非此子莫顯此母德夫自為士人  
已有歧慕前修志對嘉定癸未廷試策詳定官以語觸  
時忌繇亞魁降第十辛卯秋都城災詔求直言德夫時

為福建帥司幹官感慨草封事力詆權相謂積陰之極  
厥徵為火親黨危之德夫入白夫人夫人曰禍福有命  
當言卽言獲罪歸幸矣其宰南安也西山真公實薦之  
德夫以母老辭夫人聞之曰汝受西山知義當就職至  
則蠲橫征革蠹弊活羸殍治行卓然為一道冠曾子有  
言泣官不敬非孝也有賢母以成孝子之志可嘉也已  
夫人姓甘氏曾祖仲賢祖文雨父如松世為豫章豐城  
人夫人生而慧淑父母鍾愛以歸同邑故承事郎徐公  
琮事尊嫜盡禮相夫子以義雖處約其志樂也睦娣姒

無間言撫前室子如己出妾御有過訓飭而已鄉閭族  
嫻人人得其歡心德夫分教橫浦大振學政撤齋廬而  
一新之夫人戒勿擾故事集而人不知南安歲饑勸分  
平糶鄰境翔踴邑纔半直夫人病中猶朝夕問米價損  
益以爲欣戚愛人恤物天性然也端平改元季夏十八  
日終于官舍享年九十有二以慈明太后慶壽恩封太  
孺人三男子長光卿次鹿卿德夫也奉議郎主管官告  
院季榮卿孫男七人元老南老鼎老端老還老合老申  
老女三人俱幼諸孤以是年十有一月二十有五日葬

夫人于雲嵐之原噫樂莫樂乎榮其親哀莫哀乎喪其  
親方閩帥李農卿駿有母年九袞燕同寮之將母者二  
人于眉壽堂夫人預焉閩人作三母歌以紀其事何其  
樂也德夫宰南安纔七閱月惠汝赤子失我壽母邑人  
哭之如哭其私親又何哀也哀樂相生而道存焉誰謂  
夫人之云亡銘曰家庭之言知有西山匪西山之思思  
母之賢

湘潭縣尉趙君墓誌銘

余友湯伯紀端介不妄言持其所狀婦翁趙君言行示

家齋集 卷之七 谷際岐校  
余曰翁篤厚人也儀渠端嚴行事有典則與人言依于  
孝悌忠信請子銘其墓余曰趙君能以女妻伯紀鑒裁  
高矣余何敢辭君諱俾夫字壽翁曾大考和之贈訓武  
郎大考公彥贈武議郎始寓居饒州餘干縣考彥榛妣  
張氏夫人君家本北種有直氣不立城府好行義事君  
蚤失怙恃與伯氏戶曹掾某益自奮問學日廣戶曹取  
太常第不食一日之祿以歿君痛悼良劇奉嫂如母課  
猶子以書外祖母年逾八十時時迎養盡歡伯舅病痼  
且貧敬共資廩終其身不衰聚族衆多且字且誨死者

葬埋之祀者繼之兩以漕貢試春官寶慶初元賜進士  
第調尉弋陽未上改湘潭西尉廉勤靖共束卒以律而  
給庸錢以時異時掊取之弊一朝頓革邑有社倉尉實  
司斂散率常豐取刻與君泣以公清無秋毫私遇歲歉  
出已俸以助惠民劉氏二喪久不能舉捐數萬錢俾克  
葬君勇于義皆此類尉且更俄得疾遽卒享年五十有  
六端平元年六月七日也喪車之歸闔邑泣送出郭遠  
焉而後反十二月甲申葬邑西桐江之原先夫人傅氏  
繼徐氏子男二人時晏保義郎臨賀縣尉時昂四女適

姜雋湯謨湯漢洪桂孫男一若深伯紀之言既信不誣  
又受知當世名流干越議新邑庠吏部趙公委君度費  
經工學成壯偉爲旁邑冠湘潭西尉創置無官舍連帥  
余公予之貲未幾牆屋飭備而記其成者實西山真公  
也諸君子亦可謂知君矣然余又嘗試以事蓋將指東  
江之日發粟賑饑人縣令屬君分行鄉井凡君所斥散  
者有實賜無濫予令爲余道其事心尤敬焉然則非余  
誰宜銘銘曰質厚之人今世匪多死于一尉天也如何  
蒙齋集卷十七

蒙齋集卷十八

宋

袁

甫

撰

誌銘

承奉郎朱君墓誌銘

交際主義尙矣與其子厚敬其父義也紹定中某持江  
左倉憲節五年待賓僚如一家有迎親來者致禮加敬  
青陽尉朱冠之名元龍敏而篤學檄入幕聞其父承奉  
君老成有氣槩不知其就養也弗及見已而欲見則已  
歸後聞以疾卒元龍請銘義不得辭謹諾之以志吾過

君諱適之字子正婺之義烏人曾祖宗茂祖邦彥父昌俱潛德弗仕君幼孤母胡氏俾就師晝夜刻苦委己于學戰場屋左次不咎有司泊二子預薦書君遂不復作仕進想每爲人道貴孝友終身色養敬謹匪懈姊病而館于家奉養嫂如兄存哀諸姪而字焉治家肅整以嘻嘻爲戒伏臘裕矣益帥先崇儉獨賑窮乏無靳色歉歲設糜食餓者發廩平價以利民瘞遺馘飯羸囚苦節樂施皆此類元龍登進士第青陽及瓜欲迎侍固請乃許縱覽九華愛此奇觀居無何浩然賦歸元龍秩滿爲理

掾東江又以請曰吾聞部使者仁賑荒恤冤汝悉贊而長獄無濫民不饑父志願畢矣奚事偕往噫奔走聲利日夜不肯休世俗滔滔皆是子祿養尚倦游肯曳裾侯門乎儀狀脩偉與人交皆與其善過面斥之愚民爲彊悍屈慨然出力捄解雖召謗不悔孔子稱人之生也直君實有焉君生于隆興甲申八月乙卯卒于端平甲午己未其明年十二月丙申葬于繡湖之西原君兩該恩封承奉郎娶陳氏封安人子男二人長元龍也奉議郎知處州縉雲縣事次桂發浙漕貢士孫男四人幼成幼

聞幼特幼敏孫女五人曾孫女一人銘曰柏以堅保歲  
寒竹以直拂雲端嗟俗迷諂而隨視夫君顏忸怩大于  
門義方存我作銘詔後昆

東巖老人鄭君墓誌銘

乾淳間美材出儒風盛士恥獨學謏聞父愛子延碩師  
擇直諒友甚己饑渴自儒先凋零斯道湮鬱學者甘心  
孤陋世推真師友亦罕焉緬懷乾淳撫几太息一日舊  
僚趙克家持鄭君少宏行狀來乞銘余攷師友淵源多  
從諸老先生遊而定城令許君中應君宗卿錢君文子

則專師也內表正節李侯敬之友也李侯學出東萊呂  
成公君涵濡薰染行端方學刻苦前賢格言大訓探微  
鉤隱窮晝夜不懈性輕財重義士友至于我館資糶乏  
于我助歲大祲發私積貸鄉鄰歸逋如期慨焉焚券遇  
族嫻之死喪孤遺者周給之有品節而誨其子若弟孳  
孳無厭敦獎善救失親黨畏慕焉迹其行事破藩牆均  
人我師友漸摩驗矣君諱良朋少宏字也世為婺之東  
陽人曾祖振祖壽考紹庭皆有潛德考不娶蚤世仲姑  
為李氏婦正節母也君實自出焉祖母九十餘老疾勤



視養喪致哀毀時祀輒嗚咽流涕子女滿前授詩書示嚮方晚課諸孫戒曰我誨爾望爾孝也孝不必榮以祿在守先志我不辱先矣爾學殖落猶我辱也有味其言綽乎乾淳遺風矣君生于紹興辛巳二月六日卒于端平乙未五月十有二日越明年四月丁酉葬于邑東五里岡之原娶王氏司農卿賈之孫女先君七歲卒今合葬焉生五男子思睿早歿思義思順思忠思儼俱業進士而思順以京學生該免舉恩三女文林郎監建康府大軍倉趙必遞從事郎新監江東轉運使寄納倉陳秀發宣教郎新差知處州慶元縣喬適孫其壻也孫男六滋昭與恕怡宜女八壻進士曹仲寬趙與遷宗學生趙與鎔餘未行余與君無雅素師友皆端人信端也矧克家請不已乃爲之銘曰東陽之東有山鬱蔥東巖老人于焉從容一室委心齊家雖離古稱不朽豈伊顯融非榮之榮不逢而逢命名東麓相國肅公過者興敬師友之功

承務郎致仕洪君墓誌銘

端平二年余爲柱下史舊友洪季思名夢炎以桃源酒

官入郡幕父年登八十余升堂謁見婆婆燕愉意福壽未艾是歲九月辛巳以疾卒于正寢明年冬十月甲辰葬夢炎請銘辭甚哀曰夢炎不幸王事馳驅父病不能嘗藥沒不能視含死有餘罪余曰父教之忠子遵父訓道也且余目擊其事有三夏五月禁旅闕子受廟堂命撫定告于父父曰奮身爲國吾何憂教忠一也秋七月復被高沙撫叛之旨父曰汝全活一城毋辱君命教忠二也未幾差點檢沿江戰艦覈實荆襄守備子力辭父曰朝廷謂汝才會未三月由監當而屬官由屬官而掌

故今邊事繹騷奈何避事教忠三也嗚呼真足以厲臣子之節矣是宜銘謹按洪氏系出豫章唐末徙嚴之淳安族大以蕃派居梓桐鄉養村里六世矣君諱璵字叔瑜曾祖孜祖彥正俱潛德不耀考師騫漳州軍事判官累贈中散大夫妣邵氏繼胡氏俱贈令人君幼警拔出語驚人中散公歿事母孝一日母思食魚走溪澣求弗獲忽雙鱗躍出取以進語子女曰始吾疑王祥臥冰近誣今信矣兄琰弟璞同入上庠同登庚戌第君詞藝不後二難戰場屋左次則專意課子夢炎以春秋試南宮

有司攷定首選俄列後名士論惋惜君幸有子成立益以詩書自娛性剛勁守廉隅辨是非聞者心惕晚更和易毀譽不掛口居里閭施藥以療疫平糴以賑饑死無歸者瘞之值慈明太后錫類恩封京秩平生著述若干卷藏于家娶方氏以禮相夫子內外斬斬鄉人教女若婦必舉以爲法先君五年卒葬于所居里之朱砂塢君合葬焉葬之日賓客會者數百人執杖而導從者數百人穉耄之泣送者且千人三男子長夢林季夢珏仲則夢炎也二女甲戌進士故婺州錄事參軍方淳士人

吳從龍其壻也孫男女各三人曾孫男一人銘曰事君不忠非孝也雖有離憂志樂也弗力王事滔滔皆是視此教忠寧不愧恥

宜人趙氏壙誌

宜人趙氏諱希怡曾祖諱子英朝議大夫秘閣修撰累贈金紫光祿大夫祖諱伯淮宣議郎通判黃州累贈中奉大夫考諱師淵朝奉郎太常丞兼國史院編修官實錄院檢討官自號訥齋妣呂氏贈安人丞相忠穆公之孫中原喪亂修撰官四方因家于台之黃巖訥齋當代

端人與先正獻公爲友宜人年二十有七歸于我天稟高潔無宗女習氣魏國夫人不逮事事正獻公孝謹余小有過差宜人輒愀然不樂嘉定八年余廷對叨第一宜人箴規益切歷官中外家務一髮不掛懷戮力王事宜人助也端平元年余以秘書少監召二年遷起居舍人兼攝詞垣吏銓宜人見余有所論駁與時落落每歎息曰歸歟旣屬疾語余亦如是十月一日辛巳卒于官舍享年五十有九次年十有一月丁酉葬于慶元府鄞縣陽堂鄉陳嶼之原子男二從將仕郎次溪宜人奉己

儉與人周襟度曠然時時諷誦詩書他美甚衆不盡錄錄其夙夜警戒相成若古賢妃貞女者而納諸壙悲夫

馮君振甫墓誌銘

慈湖楊先生發明先聖知及仁守之訓有大功于吾道誘掖後學許與固多至其稱二馮兄弟振甫國壽咸有所啓發驗諸躬行果不負先生許可國壽蚤亡振甫晚益融貫表裏洞然知及之矣進于仁守矣余持節江左興建象山書院延振甫爲堂長四方學子來集振甫朝夕訓警懇至切到語自肺腑流出羣士信嚮雖負雋拔

敏贍之才者一聞振甫講說大旨卻立拱手曰馮堂長我師也道本無言言非可傳道振甫學問鑿鑿真實忠信篤敬毫髮無僞感人悟物蓋超于言辭之表學者未熟稽古書未更歷事遽親炙慈湖先生之教往往意自揣摩承襲訛舛振甫于書無所不讀履踐又有深功每聆誨言不待揣摩神領心會傳先生之道最端的無差自國壽死余爲吾道氣脈憂賴有振甫今又亡矣正學凋落云胡不悲振甫之亡也寔嘉熙改元八月十有九日享年六十有二其孤將以己亥六月庚申奉君之柩

殯于金川鄉俞芳嶼之原泣請銘余不得辭君諱興宗振甫其字也居慶元之祠溪七世矣曾祖諱有義祖諱敏功考諱奉先妣李氏振甫亦娶李氏二男子長祖授次祖詒後國壽三女越士高彌大迪功郎監温州瑞安縣雙穗買納鹽場袁庸里士伍純仁其壻也銘曰道無方體先天地生孔聖有訓參前倚衡振甫默識仁守兢兢百世之下尙欽此銘

縣尉楊君太孺人何氏墓誌銘

吾鄉城南楊氏最盛先正獻公絜齋先生久處其家塾

子弟多秀士服習詩書頡頏場屋聲譽大振子美在羣  
從中才稱雖未嘗從先公遊耳目濡染熟前輩風流  
蘊藉攷平生行事不與俗子類尙氣誼重然諾喜賙人  
急不矜己功師友漸摩有自來矣君諱璘子美字也世  
爲慶元府鄞縣人曾祖諱景舒以行義著聞鄉閭檢正  
王公庭秀爲賦碧鮮亭詩子璧實誌其墓祖諱萃温温  
儒雅聘三山鄭屯田爲塾師攻媿樓宣獻公兄弟俱來  
學邦人至今以爲美談考諱公亮蚤歲入成均四舉禮  
部不售妣朱氏娶何氏諱靜恭大理寺丞涇之孫通議

大夫楷之女今集英殿修撰侍郎炳之女弟也紹定四  
年該皇太后慶壽恩封太孺人三男子應霆兩浙轉運  
司進士宗卿太學免解進士宗琰蚤亡女四人迪功郎  
温州平陽縣主簿諸葛壽朋朝散郎主管建昌軍仙都  
觀程士龍儒林郎泰州軍事判官林思孫其壻也次女  
許承奉郎魏嶸前天孫男二人起巖習進士業起翔太  
學生應霆泣謂某曰先君之歿迂齋樓先生狀其行而  
墓碣未立今母氏又歿將以二年十一月丙申奉柩窆  
于桃源鄉西山合先君之兆敢請銘某謂迂齋發揮幽

潛至矣奚用贅然余觀舉世患之才才其真乏也耶國  
易治家難理能使一家之中綱紀繩繩內外斬斬斯爲  
實才也已君治家事從容裁制動中節會廢者植仆者  
興疏者密薄者厚親朋居無廬于我館食不繼于我廩  
嫁孤女之無歸喪不能舉者斂埋焉急義疏財一無所  
靳而尤以孝行爲本奉母惟謹左右無違飲食必擇所  
嗜敬進之祖塋精舍題扁未立時寧宗皇帝以皇孫毓  
德潛邸翰墨精妙鄭先生爲僚東宮遂爲之請寧宗欣  
然親灑青山繼德菴五大字以賜累世塋域堅壯周備

生事死葬兩無愧怍開禧初邊陲倂擾縣官以乏興開  
入仕之門君慨然曰體國固吾素志授迪功郎調台州  
黃巖縣尉尋以恩轉從事郎君治民戢盜俱有方略誅  
鋤奸猾興修邑庠捐己財新尉廨秋毫不出于民此皆  
卓卓可紀觀其處家莅官豈余所謂實才者非耶君年  
纔五十有六而卒寔嘉定六年八月戊寅也後二十有  
五年嘉熙改元十月辛卯太孺人卒享年七十有六太  
孺人姿敏惠父愛之尤教以孝經論孟詩書左氏傳及  
內則女誡終身不遺忘性恥華靡被服簡澹相夫子以

禮切磋如良友君既歿延師誨子必期成立值庚辰鬱  
攸之變再營廬舍戒二子無過侈傷吾儉尚友堂圯久  
未復愀然曰此高曾麗澤地可湮廢乎二子承志葺治  
重還舊觀發居寢久家法嚴整如一日婦道母儀可謂  
兩得之矣余既多楊君行事又讀迂齋狀謂崇陵違豫  
主鬯未立君伏闕上書累數千言使人興敬而太孺人  
又有賢行夙夜相成追古遺風是可銘也已銘曰楊氏  
先世厚德所萃蓋爲子孫留方寸地夫君特起布衣論  
事奈何忠言報罷莫遂負此偉奇家道小試內外綱維

人愛且畏推以澤物巖邑一尉琴瑟靜好儷美無二西  
山之藏瞻彼蒼蔚勿隳德其詔爾後嗣

林府君周夫人墓誌銘

嘉熙二年春宣教郎提舉行在雜賣務雜買場林君嘉  
會以書諭予乞銘其考妣之墓謹按府君諱思哲字仲  
文其先三山人後徙溫又徙處之松陽逮府君八世嘉  
定三年卜居暨陽之梅山曾祖惟周預三舍選祖攬考  
中弼俱潛德不耀府君性嗜書不治舉子業擇聖賢格  
言大訓諷詠服膺飭躬閑家與物無競肫肫然謹厚長



者也同里周君溥聞其賢以夫人歸之夫人年纔十七  
端莊沈靜不妄語笑家素貧惟以訓子爲急晨起府君  
入家塾講授經史夫人夜課之桀矍尤嚴諸子俱業進  
士嘉會遂擢第奉常冠乙科先是府君語嘉會曰吾年  
未耄而健忘非久人世者但欲見汝成立慰我志耳尋  
果以疾卒若前知者寔嘉定十三年八月丙戌也享年  
六十有四次年十月庚午葬于清潭山之原夫人晚歲  
益康強兩該恩霈封太安人嘉熙改元嘉會宰婺之東  
陽改倅通州未上徑躋朝列親黨榮之夫人澹如也蓋

其志在厥子植立門戶匪徒慕爵祿耀光寵而已次年  
正月戊午卒于中都之寓舍壽八十有二將以四月丁  
酉與府君合葬焉四男子長嘉謨次嘉會也次嘉謀嘉  
猷嘉猷蚤世一女適進士周恭先孫男五人登孫鎮孫  
承孫鉞孫鑑孫女八人曾孫男一人女二人某曩將指  
江東寔與嘉會同寅因子之賢知嚴父義方之自抑知  
賢母之教爲有助也然則非余誰宜銘銘曰夙夜相成  
琴瑟靜好蒼天曷不偕老雖不偕老有子承考子  
兮孫兮光我家道

提刑秘閣程公墓誌銘

嘉熙二年中奉大夫提舉紹興府千秋鴻禧觀程公諱  
榆告老于朝天子俞其請進直中秘以寵嘉之鄉之士  
大夫用漢立德唐貞曜本朝明道故事號公爲安節蓋  
公退居山林十有餘年安節之名不忝矣孟子曰聞伯  
夷之風者頑夫廉懦夫有立志范文正公記嚴子陵之  
祠亦曰先生之風山高水長嗚呼來不知所從去不知  
所往而自能橐籥萬物者其風之妙乎公之言行有家  
傳行述記載明備而公之子沐又乞銘于余余惟錄其

細沒其大非銘體也蓋公平生大致不爲勢利屈超然  
獨立風塵之表自嘉定大臣已落落不苟合至鄭丞相  
當國尤屹然決無阿附意寧芒鞋野服蹈丘園玩泉石  
以終其身然則天子之褒嘉鄉士之推尊聞公之風者  
可以廉頑立懦而與山高水長相爲無窮矣公字森之  
處州松陽縣人曾祖起祖臚考大雅贈宣奉大夫妣葉  
氏楊氏俱贈淑人公登紹熙四年進士第歷徽州績溪  
縣主簿監建康府北酒庫知信州玉山縣通判慶元府  
知金州提點廣南西路刑獄旣奉祠里居一字不入脩

門泊屬疾亦不以死生動毫芒嘉熙二年六月二十有二日卒于正寢享年六十有八娶陳氏參政越國公之女先公二十七年卒繼葉氏既歸之二年亦卒俱贈淑人子男一卽沐也文林郎監行在省倉中界門女適浙漕進士葉東新撫州錄事參軍張忱進士陳炳文孫男鑄將仕郎以是歲十一月甲申葬公于縣之移風鄉紫山名義爲國之大閑也廉恥立身之大節也綱常不明利欲橫流撤大閑隳大節他美莫贖故余于公之出處獨表彰其大者至于爲邑爲州如古循良將指如古膚

使力扶風教受知儒先懿行嘉言不可殫述皆自其大者發之而余又知公之植立非但天資乃學力也余每與沐講論經義歸必告乃翁輒欣然領會其意屬余大書其堂曰中庸公益喜憾相得晚戒沐朝夕觀省勿忘然則余之知公與公之自知豈徒素隱行怪後世有述而已哉余嘗爲言滿天地間莫匪中庸人謂公以不仕爲高孰知所得乃在乎此使時見用其不爲沮溺明矣乃系之銘曰嗟芷蘅兮芳自吐耿離憂兮心獨苦臥故山兮幾寒暑非避世兮時不用抱中庸兮炯千古子子

孫孫兮事斯語

撫機關君安人郭氏墓誌銘

余雅聞關仲山之名未覲面也而狀君之行者乃林君伯翰伯翰余所畏言足以傳信矣其略曰君諱嶠字仲山先世居青社五代之季有避地會稽者子孫遂家于台曾大父軾大父碩俱不仕父靜贈承事郎君生九歲而孤母夫人王氏擇師訓之嚴必期成立入太學值光宗龍飛恩免舉登紹熙庚戌進士第授迪功郎臨安府鹽官縣尉以母憂不赴復尉慶元之慈溪秩滿陞從事

郎調德安府司法參軍終更用薦格改宣教郎知建寧府建陽縣事既受代會新使者至豪強之不得志者共爲飛語中君被重劾謫三山事既得白許自便復官授江東安撫司主管機宜文字戍期將及以疾終于正寢寔嘉定十一年二月十三日也年五十有九官終承議郎娶郭氏封孺人有平齋類藁三十六卷鍾呂集一卷藏于家君天資莊重酷嗜書雖道塗驅馳牒訴紛委得休暇卽挾策諷誦作詞章不但不浮吏事精敏所至著能聲性輕財急義自奉薄而與人周伯翰許可如右郭

孺人既嫠居該紹定辛卯東朝錫慶恩加封安人卒于嘉熙二年戊戌正月二十有九日享年七十男二人長曰琪先卒八年矣次日玳習儒業三女皆先卒中婿新隆興稅官郭掄安人從兄之子也孫男二孫女二尙幼嘉定辛巳葬君臨海縣義城鄉之豐山將以今年十一月十有三日以安人合葬焉玳諭余曰吾母東陽望族也性婉嫵有賢行先人得盡力官業不以家務累其心者母氏力也敢請銘余太息曰君所歷官凡三吾熟其二焉慈溪吾鄉邑也地陝號易治民去思至今吾嘗守

富沙矣建陽俗最獷富豪根據盤互令俛首聽命迺安小欲自見禍立至又余所目覩也君處難若易游刃有餘未足爲多旣謫三山蕭然四壁闢一室曰龜巢又名小齋曰且休閒嘗賦詠不知身之在異鄉也庶幾篤于自信夷險一致者矣然則微伯翰猶當銘況可取信乎銘曰不汲汲于富貴不戚戚于賤貧吾聞其語思見其人遷謫二年奚愠之云吾王聖明罪實在臣千古此心昭假明神夫義婦聽是曰彝倫雖死不朽相敬如賓

太孺人卞氏墓誌銘

佛氏之教徧天下儒者陰信其實而陽諱其名余每病之洪範五福壽富康寧攸好德考終命佛氏以福田勸人其所謂福亦不過如是舊同僚張亨之爲余言祖母母家饒于財旣嫁能節而自裕素康強無疾病好善尚慈儉臨終沐浴更衣翛然而往壽九十有二余曰是乃備洪範之五福無一闕者及究其所以然則得于佛氏之教妙年卻葷不御持誦觀世音號精嚴匪懈一夕感夢履坦塗左右顧盼幽閨虛曠布地皆金沙晶光奪目一人肩蓮華來拱揖分兩枝見昇夢中疑非人間世覺

而神爽思清語家人曰此西方淨土我沒其遊此乎念慮專靜精神默通于是驗矣余將指江東亨之主東流簿敏而有守余愛之遂檄入幕後爲坑冶屬官亦相與周旋且歌詩爲太孺人壽別來三年而亨之以書請銘人生朝露耳惟得道者雖亡而有不亡者存太孺人姓卞氏諱妙覺雪川人同里張公諱思明之室始父母議擇對不肯嫁凡子名閎豪族皆弗願聞張公賢譽欣然歸之雅不喜紛華不妄言笑澹如也舅姑性嚴毅恪謹婦職奉甘旨惟恐後治家一遵禮度謂婢妾亦人子雖

怒不出惡聲機巧鉤距之態豪髮蔑有真佛氏所謂清淨者耶紹定辛卯該慶壽恩封太孺人端平乙未正月十有二日卒于正寢嘉熙三年三月十四日葬于城西雪水鄉開元山之陽一男昌時承務郎二女進士吳浩黃永年其婿也孫男二人長應運登丙戌進士第儒林郎兩浙轉運司物料官卽亨之也次應龍習舉子業孫女一人適吳門進士曹汝賢曾孫男三人女一人俱幼噫爲佛之徒從佛之教易能也得佛之理不泥佛之迹難能也太孺人有得于佛氏而誨子孫則以儒識超塵世之表行修闡闡之中余謂偉男子未能過也乃述其精誠之應感以參其平生之行事而系之以銘曰是夢非夢金沙非砂其蓮花耶亦非蓮花夫人得之無礙無遮壽于而躬昌于而家淨土逍遙樂也無涯

曹君能謙壙誌

國朝風節名臣多賢子孫天也曹氏在天聖中任御史知雜諱修古者直道不阿凜凜生氣至令子諱覲皇祐間守封州以捍儂寇死節余與能謙爲僚友聞祖風斂衽起慕余屏居山樊能謙束書終日諷誦夜挑燈忘倦

論議灑灑信其爲名賢後也曹氏家世出建安後遊宦  
無定止今居安吉長興之和平曾祖諱照洪州分寧丞  
妣莫氏祖諱驤信州推官累贈中奉大夫妣莫氏繼劉  
氏俱贈令人考諱待聘通守福州兼宗正丞奉祠終朝  
散大夫妣周氏宜人能謙諱逢己生于嘉泰元年十月  
癸卯嘉熙二年六月甲寅卒于正寢得年纔三十有八  
將以三年十有二月庚申葬于縣之嘉瑞鄉城山沙墩  
之原娶趙氏故太常丞師淵之幼女余亡室妹也能謙  
性明敏有巧思而根于孝友恥僅以才稱與余處動中  
繩墨孜孜于切己之學其賢如此固御史之報抑宗丞  
躬行力義方嚴有以倡之也能謙有庶子憫仲氏無後  
慨然以奉烝嘗其亡也趙氏方謀命繼而未之決能謙  
猶子主嘉定簿名夢龍請余志其壙余感愴良久銘之  
曰生而賢嗇長年人何愆有命焉家道綿清名傳世爭  
先我後鞭試問天然不然

叔崇禧兵鈐公墓誌

公諱任字信翁世家開封徙鄞曾祖灼左朝議大夫尚  
書倉部郎中妣石氏封恭人祖埴登仕郎妣林氏父有



義贈武顯大夫妣劉氏贈宜人公以聯姻袒免宗補承節郎監處州酒稅尉荆門長林縣監潭州永豐倉荆湖南路安撫司準備將領就辟本司親兵統轄充樞密院正將副福建路兵馬都監秩滿因仍者再頗有倦遊意奉雲臺沖佑祠爲處州兵馬鈐轄終厭仕祝釐崇禧觀凡三載嘉熙三年九月庚辰卒積階至武節大夫享年八十趙氏宜人先公歿二子南忠訓郎永平監物料官高業進士女適趙時擇修職郎紹興府戶掾二孫夢得蚤亡饒孫男等將以四年二月庚申奉柩葬于鄞之翔

鳳鄉青山原合宜人之墓某于公爲子行公幼從先正獻公學以材猷自負而又能以儉約自持居官舉職受知當世名公馭軍紀律明恩信孚晚歲益簡澹教子切切不倦南嘗薦名春官葬日薄二子泣請誌歲月噫我正獻公壽踰八表公年亦似根諸簡質欲寡易足心小罔失觀我斯志百世一日

主簿呂君壙誌

君諱夔友字子韶姓呂氏世爲齊之歷城人曾祖諱頤浩中興名宰相贈太師秦國公配饗高宗廟庭謚忠穆

祖諱撫朝散郎直秘閣累贈大中大夫父諱昭亮朝奉大夫知隆慶府妣錢氏封宜人自忠穆扈蹕南渡寓居赤城隆慶又徙會稽子韶以父任入官授迪功郎監衡山銅鉛場未上改調富陽縣主簿該東朝慶壽恩循從事郎嘉熙己亥卒于富陽官舍得年四十有三娶相山王氏善經紀家事子韶賴之男學治將仕郎女未行學治將以庚子三月甲申奉柩祔葬于諸暨縣義安鄉西山之祖塋子韶有美質識趨舍每念先烈如許我乃沒沒無聞厲志好修期自植立某之亡室視子韶爲中表行爲余言子韶弱不好弄長無子弟之過孝友篤于閨門余察之信然可以遠到矣而僅止此天平學治泣請志歲月嗜忠穆鴻勳施及後昆仕途雖屯典型猶存西山之墳百世清芬

蒙齋集卷十八

蒙齋集卷十九

宋

袁

甫

撰

賦

覺賦

厥初生民兮通天地之性情名之曰覺兮為萬物之最  
 靈此靈此覺兮匪自外生知學之為覺兮亘千古炯炯  
 以光明懿姚虞之傳心兮曰惟一以惟精伊尹憫後覺  
 之未覺兮非予覺之誰其鳴衛武公歌有覺之句兮千  
 載猶播其芳馨洙泗先覺之是賢兮此道參前而倚衡

人日周旋乎此覺之中兮蚩蚩之氓自榛義路兮自辱  
自榮委厥美于昏昏兮悵終身之冥行嗟乎孰聰爾聾  
兮孰明爾盲瞻彼飛鳥兮整羽翮以霄橫伊人之時習  
兮一日覺之維心亨誦魯論之首編兮澹然立酒與太  
羹得懌悅之真味兮舉萬物莫之能嬰須良朋以切磨  
兮感伐木之丁丁苟精神之密契兮輕千里之脩程樂  
莫樂乎新相知兮皆天下之英也神之聽之兮奏九磬  
之和且平也說樂之極矣愠奚自而萌天地之并包兮  
善勝以不爭滄海之納藏兮又何問乎濁與清知不知

無與于我兮吾何心乎毀譽之營營嗟乎此覺之妙兮  
本無虧以無贏第見觸物畢露兮觸事畢呈紛萬有之  
形象兮本無象以無形觀太虛之寂寂兮孰識音聲于  
杳冥嗟乎此道吾終莫得而名

靜壽賦

試觀夫宇宙之大廣漠鴻濛無際兮無畔何始兮何終  
乃于其間有物穹窿小而培塿猶有屹立之狀大而喬  
嶽不知幾千萬重曲折兮回旋起伏兮蜿蜒其長亘地  
其崇倚天吾履其麓而不敢指其肩日是孰使之然耶

其母乃元氣扶輿磅礴偶得其全耶又母乃性質孤高  
峭拔獨立萬物之表已在天之先耶不然何以不與萬  
物忽生倏死而獨縣縣延延不知紀年耶吾夫子對此  
巋然若有以警將使後學默自深省迺發仁者樂山之  
語不得已狀之曰靜又申之曰壽以見其靜而且永大  
哉聖訓日星炳炳言近指遠神交心領既不可求其象  
又烏可繫其影且獨不覩夫草木發育雲煙蓊鬱寶藏  
晶輝虎豹出沒隨四時朝暮以無窮常見夫生意之勃  
勃加之無益乎纖毫損之不虧乎一髮振萬古以如茲

度歲月兮倏忽反而觀乎一身之所寄以求夫靜壽之  
深致赤子之生湛然清粹及乎漸長乃殊童稚真淳一  
散橫生情僞謂耳目驅之耶然有耳不可禁其聽而目  
不可止其視謂事物汨之耶然物來不可得而拒事至  
不可得而遲耳目本以發吾明吾反以晦吾明事物本  
以資吾生吾反以喪吾生咎其未能靜也吾將塊然獨  
處脫屣夫世故之營營患其不克壽也吾將泰然養浩  
伴明月而侶長庚徐而察之迺形存神往境寂心馳萬  
感俱集朋從爾思填膺私慾滿腹羣疑言乃多悔駟馬

莫追戕賊天常罪孰大斯吁始謂靜者善之徒今乃惡之歸始謂靜者壽之胎今乃天之基然則其殆靜壽誤之耶曰非然也易稱不動無思無爲詩歌帝則不識不知無思爲也而非死灰不識知也豈槁木哉動常生于靜靜乃動之友天地有陰陽人物有牝牡生生不窮是以能久久而不息不朽靜壽之母壽靜之子當其靜時意念不起起從何作不起誰使起從何來不起誰止誰令意生誰令意死非死非生誰識此理意或在此亦或在彼非彼非此何物比擬蓋至于是吾不知孰爲

動孰爲靜動靜尙無迹人安可形諸言亦不知孰爲壽孰爲天壽天尙無端又安可以書傳且萬籟盡息靜之至也然而谷虛響答有若鼓吹狂飆怒號厥聲震地山雖守其寂寂而動也亦通乎一氣萬古不改壽之極也然而陵谷遷移俄焉一息負之而走何俟有力山欲與天地長久而變也遽失其青葱之色吁本無靜也靜則有體無動無靜妙哉斯旨本非壽也壽猶有算非壽非天義乃一貫變態多端而靜自如摧裂無常而壽莫踰匪實匪虛匪行匪居孰測其極孰究厥初吾悲夫後之

論者有二說焉或挾山以傲人則曰人役役兮不如山  
之間山處閒而享長年兮豈人生脆弱之所可攀或挾  
天地以傲山則又曰山不能載地而地則能載山山不  
能增天之壽而天則能使山壽于兩間陋哉二說又何  
足班蒙于是斷之曰子謂天地大于山山大于人之身  
吾謂人不能獨大如山而天地亦不能外吾仁是仁也  
天地未判其存純純天地莫位其用無垠當其安止洞  
然忘我曾不累乎一塵及其無窮以永天年又奚八千  
歲之椿凡有血氣體同愛均自吾親以及吾姻由吾鄰

以及吾民發生萬彙兮氣序之春潤澤普天兮其膏匪  
屯開八荒之壽域皆仁靜之所因天地尚待我以裁成  
況此圓形之嶙峋蒙也居遠于山願與山親累石爲之  
斯未足珍胡不登余之樓兮森翠巘而橫陳目爲豁兮  
肩爲伸愛之無斃兮遂日以新富此奇觀兮孰爲吾貧  
或曰堂擅此名兮山匪天而以爲人樓不有此名兮山  
匪假而得其真若子命名豈實之賓予拊掌而笑曰子  
若以真假較淺深耶余與子終日論仁而子不自知其  
心子謂心可得而摸索兮孰知是中之妙不可得而尋

尋之不見浩然長吟吟非以口以寫我襟我襟既寫泳  
魚飛禽渾渾融融如鼓瑟琴山乎山乎亦賞余音

鹿野賦

山因人高兮山何怪奇水隨人潔兮水何清漪山水契  
予之心兮不惠不夷昔臯禹之爲輔兮躋虞氏于雍熙  
何東魯之栖栖兮彼沮溺夫又奚知春與秋其代序兮  
羌造物亦莫之違拯赤子于塗淖兮策駟馬孰予追誓  
攄蘊于予心兮絜毫釐以嗽辭既知予之眷眷于靈修  
兮蓋庶幾乎濟時爲世臣襲世官兮奚敢惰其四支茫

茫九州孰爲安處兮乃欲遺君父以其危自古困厄屯  
遭之極兮乃見賢哲之騰輝余故曰無可無不可兮胡  
不觀天道之推移合與不合行與不行兮又奚必逆料  
而過思吾但知行吾之命義兮舍靈修復將安之

四言詩

述易述雅二章與趙清臣制帥

六十四卦惟謙純吉九四大臣居位以德滿則易敲盈  
兮斯食惟謙下人不違天則此則伊何元無損益澄然  
太空秉心惟一明哲保身神所輔翊持此撝謙與宋無



極

大雅不作詩謨音希公既奏功袞衣盍歸歸矢爾謨琅琅厥辭用添帝聰燭于幾微天位孔艱夙夜彌違逆耳爲忠隱情乃欺擇乎二者上帝監茲煌煌祖業忠臣念之

三衢效周雅作鹿鳴宴詩三章

鹿鳴鹿鳴呦呦之聲我有嘉賓柯山之英來燕公堂天府是升同我鄉老適觀厥成  
鹿鳴鹿鳴食苹與蒿我有嘉賓柯山之翹歲逢丑矣喜

見斗杓我有旨酒嘉賓是招是邀

鹿鳴鹿鳴惠我好音我有嘉賓言獻其琛雖則軒裳不改山林我有十箴以淑我嘉賓之心

朝陽三章

日之出矣于彼扶桑鳳之鳴矣于彼高岡匪高岡則鳴朝陽之光君子如鳳愛此朝陽純德孔明聞于四方日之出矣其光融融鳳之鳴矣其聲雝雝鳴于何所于彼梧桐鳳兮鳳兮和樂沖沖匪鳳匪桐在君子之躬日之出矣萬象光明鳳之儀矣簫韶之音觀彼儀鳳以

觀我生生不息匪虧匪盈面此朝陽默養和平

和韓履善韻

雨雪霏霏青山華巔能令山老曷不老泉雪高高山雪  
深深淵山自寂寂泉自涓涓我愛嶙峋亦愛漪漣雪兮  
入水我觀其瀾雪也在山我取而餐入水不見依舊靈  
源在山見雪不見蒼然蒼然雖改巋然則存見與不見  
神光渾全悟此雪詞龜龍參前一止一流誰合誰分忘  
言爲贅言本無言

和晉齋兄韻

斟酌元氣斗爲帝車四時迭運其信也且天道不言莫  
非教歟日之升矣雲翳掃除本無體質湛然大虛歷山  
舜耕雷澤舜漁天德首出茲焉權輿晉齋作詩誨語勤  
劬我處山樊飲水飯蔬一雨蘇旱民氣歡如東鄰殺牛  
西鄰割豬市買不售始到吾廬買來烹之每食無餘涼  
哉枕簟凄其葛練忽念世塗滔滔淪胥自昔興亡具載  
詩書蠱弊極矣誰與爬梳已而諦思驚餌如魚誰謂王  
門可輕曳裾觀詩末章荷兄警余老冉冉至虛度望舒  
學貴密察勿事恢疎一念微差惡草必鋤真剛大勇那

可躊躇未濟濡尾既濟濡柳元自昭晰無惑可祛拜兄  
忠告其敢忘諸且此養痾誰毀誰譽

和惠宰 端方 修縣學韻

人爵非貴天爵惟尊賢哉惠侯興學祁門祁門之士夙  
號有文兌習久廢索居離羣自侯來思銳志興復士脫  
舊穴遷于喬木人性本善混混源泉四端素具若火始  
然誰其啓之君子德風既修學宮藏修其中內養克充  
外養亦備爾不吾負吾寧爾棄壇名舞雩樂道無欲梁  
跨幽澗潺潺漱玉面此清致皆學之助本心融明庶幾

寡過滔滔世途人而匪天兒童之戲殆類紙鳶

番陽喜晴贈幕僚

大江以東歲屢弗康民病未蘇正茲憂惶一雨六旬巨  
浸湯湯我告上帝是祈是禳我來宿齋室名朝陽顧瞻  
斯名與我心當天告我兆厥應果彰朝陽一升陰沴伏  
藏衆水歸壑殃轉爲祥民奠攸居歲保金穰耄倪載詠  
喜氣洋洋匪我顓蒙能動上蒼賴我諸友罔或怠荒齋  
事孔明純誠是將上帝昭格隨此瓣香我勉諸友秉德  
日彊朝陽在我自然發光陽復之始養而勿傷常加對

帝中正齋莊乃保終吉以活吾氓稍或安肆罔念作狂  
政刑弗謹號令弗臧天非可恃祥覆為殃敬之敬之斯  
須勿忘既以告友抑以自防

贈韓拙堂

世所謂巧請為翁說巧于利口佞辭河決何如吉人其  
言呐呐巧于附勢炙手可熱何如節士剛腸若鐵巧于  
營生百計漁奪何如儒家冷淡生活拙反為巧巧乃大  
拙驀然猛省比論未徹本無巧拙奚較優劣大道融融  
曠兮太空惡不待攻善與人同客訪拙翁攜酒相從客

去西東翁數飛鴻春日烘烘適興攜筇興盡呼童燕坐  
堂中一門雍雍蘭玉玲瓏客賀拙翁笑倚長松

題梅四首

占斷春光水邊橫枝欲識生意未著花時  
雪欺梅耶抑梅欺雪孤高之操凜凜清絕  
花勿盡開盡開香歇勿待月圓纔圓即缺  
竹外一枝嘯傲東風許多真趣在有無中

石松子

殼堅于石色白于雪仁在其中香味清絕况之松子格

韻度越庭前柏樹視此亦劣松柏著土其子乃結此仁  
無根更何所著松柏有種有枯有活此仁無種生生不  
滅天不能裁人不能伐吾欲令此仁普徧廣博吾欲令  
此仁取之不竭家家具足可採可擷人人圓成可咀可  
嚼初無奧旨亦無秘訣不假思量何勞論說箇中渾全  
了無分別仰見高山兮石洞之穴俯此清泉兮萬古不  
涸

五言古詩

江東巡部紀行

春過三之一輕車走阡陌平坂抹池陽迤邐山路埆風  
顛吹人面雪滑駮人足忽然銅鉦掛九華醒兩目自經  
千萬劫寒翠光堪摘半霄非人間大江橫其側行行逼  
宣州麻姑正面矗且上敬亭山感慨懷李白聽說三洞  
天渴見恨無翮巖幽鬼神哭罅開星月燭金沙爛吾前  
祖師燈未沒賡酬二三子不覺詩筆秃歙州我舊遊迎  
笑兒童簇本無棠蔭芾漫云恩波沐黃山悵無緣不得  
搜僊窟祁門山何如險與石埭埭山花溪邊明時有新  
鳧浴古水龍吟嘯巨石虎蹲伏偉哉岳鄂王提兵舊盤

礪像設儼遺祠光芒射斗宿凌晨拜祠下憂思心惻惻  
無心惜落花惟愁民捐瘠浮梁與樂安五十笑步百幸  
瞻慈湖祠風聲尙堪憶鍾君我所敬能續慈湖脈乍合  
又倏離人事渺無極別友情無奈看山意無足山圍如  
城郭漸逼鳴山麓父老闌道叫一路藉神福問爾所欲  
何作廟新奕奕我來爲爾民爾欲我籌度越宿至薊谿  
三山森在列顧我一瓣香端爲象翁設象翁百世師此  
道揭日月書堂下築成屋與人俱傑深夜濟濟容學子  
紛四集前廊問伊誰同門舊知識新知有二鄭操行端  
矩矱此學其興乎欲去令人惜大字書磨崖字徑二三  
尺匆匆過安仁交友相追逐湯董最可人吉德伴金玉  
干越今稱賢閭閻聲籍籍此聲買無價民彝知未滅我  
行三千里六十零四日明當抵番江秉燭寫胸臆若夫  
諮諏事多賴諸賢力云何略不書此是使者職

和高應朝

明越兩相望別久忘歲月今秋對標桀喜見冰玉潔實  
材信有用至剛元不折青青歲寒松不畏霜與雪世道  
有夷險人心難泯滅煩公作津梁勿使微言絕

贈單判官秩滿言歸

達士如弦直直乃根性天平易無他事大道本自然吁  
嗟機巧人屈曲而拘攣不求心境靜但取世俗妍我來  
官柯山同僚單君賢贊畫得飲助直道無盤旋廉介味  
已熟恬退性所便兩載日追隨使我無大愆臨行重惜  
別贈君可忘言所願松柏操歲寒毋變遷

寄題夏時甫曉山亭詩

夏君人中英訥齋天下士襟期脩篁友節操孤松比大  
書曉山扁山色來斐几愛此朝氣爽未明攬衣起訥齋

我婦翁頗曾窺涯涘結交折輩行逢人說夏子因讀曉  
山吟令我慨生死人世亦何爲仕宦聊爾爾孰如死不  
朽香名垂千祀此人不復得此詩誰能似時甫盍刻石  
方山可對峙

分題得莫氏荷池

我老貧無居借宅橫水北軒窓五月涼四面遶脩竹方  
塘貯清泉綠淨蔭湖目初疑青錢小稍展圓蓋綠紅妝  
出菡萏斂萼似羞縮清晨露華滋掩萼耀容服風來香  
十里雨過珠百斛全家在清涼衾枕有餘馥吾師老瞿

曇六入漸驅逐塵囂化五濁熱惱變三伏食實餐其根  
對案何用肉

螳螂捕蟬詩

鳴蜩善擇木木美葉敷腴國于美蔭中自慶無他虞螳  
螂伺其便欲進復趨趨怒臂俄一施捕取如囚拘委身  
膏利吻性命纔須臾均之細微物一何強弱殊蜩乎汝  
無識自知其過歟物在宇宙間謹默迺安居今汝獨聒  
聒晝夜長喧呼汝鬧力不足彼靜智有餘勝負從此決  
誰謂汝非辜螳螂既得意自謂真良圖那知僅一飽異

鵠已窺覷出爾反乎爾胡能獨全軀乃知禍與福不係  
巧與愚噫噫固不免默默復何如置之不足道燕坐觀  
厥初

七言古詩

忠孝詩

曾子立言詔後世戰陣無勇非孝也戰死猶留千古名  
丈夫赤心爲宗社而況拌死乃得生父母遺體非輕捨  
忠孝從來只一原此道于今識者寡慈湖老師遺墨在  
光燄萬丈追風雅發揮天經與地義爲憐世人多聾啞



跋語流傳壯矣哉忠由孝出非外假厥今邊庭尚繹騷  
 狂寇飄歛陵諸夏孤忠步步踏實地紙上陳言付土苴  
 報國卽是報親恩忠孝斷斷非二者兩闕對峙貴通情  
 惻懷如水常善下不見天高并地闊要令物物歸化冶  
 雍容譚笑淨邊塵直把妖氛都汎灑名垂竹帛增親榮  
 入覲至尊醉金尊到此純孝通神明冥冥之中錫純嘏  
 病夫山中何所能功成請將椽筆寫

辛亥寒食清明之交杜陵先生暫歸省謁與諸生  
 食罷游後園獨坐蕭然戲作長句示諸兒

春風吹花次第芳桃紅李白薔薇黃榆錢柳絮飛欲狂  
 醱醑引蔓草木香老人燕坐窺虞唐目覽千載游八荒  
 羣兒犇趨如羣羊走過東阡復西廂歸來汗喘無可將  
 何如明窓治墨莊原註陳省華夫人事讀誦經史聲琅琅音節閒  
 美非笙簧有如農夫勤理秧秋來乃有千斯倉先生旣  
 至心不忙背念袞袞傾三湘一語蹇吃涕泗滂老大空  
 腹徒悲傷聖明天子坐未央收拾俊傑羅文章袞然舉  
 首充賢良仲舒軾轍俱軒昂吾家有子雛鳳凰聲價一  
 日馳帝鄉隨羣逐隊恣頡頏終抱糞壤如蜣蜋

和陸伯微韻

皇都喜見天宇晴好風拂掠條不鳴幽人領袖二三子  
適意湧金門外行雲岫重重仍翼翼舉頭不愧林間翮  
賞心樂事浩無涯獨念黎元生理窄胸中宿昔富兵機  
氣壓賁育走且疲卯年會見佛狸死天數一定端可推  
九重求士忘食息三聘躬耕在昕夕願君努力應時須  
宇宙垂名長的樂

和楊秀甫韻

天下大物山與泉山泉爲蒙義皎然坐對巖巖聽潺潺

以茲名齋日周旋楊君作詩老更妍解把山泉寫天全  
山谷松梅詠坡僊到今筆語帶芳鮮松梅雙清固堪憐  
孰似山泉浩無邊顧我蒙養鑽彌堅要參聖處力加鞭  
楊君一見出佳篇古淡端如朱絲絃絃中傳雅奏難共  
俗人言我欲和君一兩聯山泉入夢且高眠

見牡丹呈諸友

從來洛花天下最姚黃魏紫尤奇異坐令百花失顏色  
喚作國香誰是對十年之前來新安闕盡妖嬈興欲闌  
晚得一枝睡露蟬分明好似畫中看人世匆匆駒過隙

重遊正值春三月園丁折得數般來旋買瓷瓶謾成列  
殷紅照日更嫣然輕素含風玉色鮮中有楊妃曾一捻  
咄哉尤物累天全我今褰帷問疾苦皇華那受妖花汙  
擲置道旁何足惜亦如佞人吾所惡頓使心胸和且平  
況聞麥隴香氣騰處處一犁春雨足家家合掌慶豐登

湖月贈朱幾仲

天上月三五盈兮三五缺湖中月無缺無圓無生滅天  
上月蝦蟇妖精敢作孽湖中月能使癡慕蹤影沒豈是  
蟾兔不如龍不知龍有何祕訣斃社湖中看明月湖中

天上雙皎潔湛盧令我書大字老來百事懶且拙惟有  
作字氣如虹寫罷森森清徹骨神龍見之應驪首共伴  
寒光千古揭夜夜明月照我字我字照湖兩相埒更得  
湛盧著佳句便與孟城成三絕

蒙齋集卷十九

蒙齋集卷二十

宋

袁

甫

撰

五言律詩

詠丹桂贈周純甫馮德厚

一種自然色如吾方寸丹天教傳信到人莫作花看骨  
氣超凡俗聲名徹廣寒留君良爲此憶別鼻休酸

原註  
時純

甫求  
歸

復用前韻

孤卻團圓月今朝桂子丹莫教疎雨打留向晚秋看色

借幽巖秀香通古壑寒癡兒被花笑世味只辛酸

七言律詩

和韓履善韻

談經說史謾支離大道寧容小智窺山峙川流俱是妙  
鳶飛魚躍兩忘機識天乃樂天之樂非我安知我不知  
細讀新詩消息好桃花見後更無疑

和王伯友韻

三春強半麥青青是處田家只望晴雪壓霜欺愁正極  
日融雲淨眼增明紛紛民瘼關吾念得得天公相此行

更問老農官與吏幾人貪濁幾人清

和毛中書勸農韻三首

曲奏梅花促曉更更聲方斷又鳴鉦籃輿咿軋親巡野  
櫪馬喧填看勉耕酒酌田翁添醉色澤均收叟助歡聲  
天公也欲催佳句特放晴光分外明

歷遍田疇問我農都言杼柚久虛空吏胥祇是工椎剝  
倉廩何曾識腐紅願得家家歌樂歲直須日日扇和風  
如今拙手徒餐粟慚見天民四者窮

勞農因得步河橋仰視前賢隔九霄凡骨難仙安素履

腐儒學吏守邦條  
荷公美意鞭駑質  
惠我名篇勝翠翹  
痛飲春醪那可強  
胸中磊塊把詩澆

和越帥汪仲宗韻

稽山窟宅盡神仙  
多少棠陰屬鉅賢  
萬壑千巖長似舊  
一翁二季美無前  
風流自昔遺芳在  
衣鉢于今盛事傳  
行見直聲追軌躅  
豈徒慶禮侈賓筵

和南康守韻

結亭故事重拈出  
領略匡廬高更高  
身在山中迷面目  
心遊局外見分毫  
平湖雪意漫天急  
古木風聲捲地號

此地徐徐鼙鼓節  
知公一念在民勞

和履善遊三洞天韻

長空萬里普光明  
此地緣何獨著靈  
不是天晴窺白日  
愛他月黑滿疎星  
石松有子能呈巧  
金囤無沙似遁形  
驀地回頭千萬點  
諦觀頓使我心醒

和令君歲寒亭韻

老幹森森當翠屏  
壁間詩句有留名  
昔逢利口擠之死  
今伴蒼髯凜若生  
雪壓枝擎猶有力  
月高林靜更雙清  
撫松似共黃門語  
況聽蕭蕭枕上聲

蒙程伯寓知府給事以僕生祠妙唱見寄輒次韻

奉酬

聞道邦人尚去思栽松植竹遶叢祠要知獨立無言處  
正似危城援絕時平世功名付圖畫暮年活計在鉤絲  
謝公旌旆巡山後千里慇懃寄好詞

新安鄉會

紫陽自是神仙窟誰泛仙槎競問津二妙先傳聯璧喜  
九人齊著賜袍新自憐十載龍門客來領三科燕席賓  
酌頌年家無浪語

原註季弟獲添勝末

黃山高節兩嶙峋

送池陽張倅奉祠歸清江二首

題輿名滿大江東忽憶家山閣皂中孤棹賦歸猶帶雪  
深衣養浩直摩空從教風月分多少獨抱春秋究始終  
籍湜近來知叛否只君不負紫陽翁  
自憐凡骨未能仙每對仙都輒爽然序齒十年兄弟行  
論交一日友朋緣干戈滿地心憂國事業彌天世急賢  
已把封章排紫闥未容問舍與求田

魏鴻禧敘別二首

世間萬事盡筌蹄塵外工夫好者希大道精通元自在

蒙齋集 卷三 四谷際岐校  
旁門淺陋謾多岐六年鐵冶勞經畫九轉金丹默受持  
歸去小溪溪上坐要求消息在嬰兒  
別有金丹簡且真不煩火候不勞神自知自信融融樂  
無慮無營益益春天地遊心元廣大風雲入句更精神  
我將歸去償茲願溪上相逢只幅巾

釣臺

朔風吹我到巖灘擁被掀篷一破顏寒色侵凌欺白髮  
雪花撩亂失青山未消據案千塵積且愛哦詩一餉閒  
慚愧釣臺風韻在他年歸隱許躋攀

晦庵文公祠堂用令君韻

當年獨抱伯牙名身後祠堂列佩衾官職平生安義命  
詩書終老惜光陰一椽古歛溪山窟千古長松風月林  
彭令經營真有趣箇中應契老師心

岳忠武祠三首

當年老檜肆欺謾忠武哀哉抱寸丹賴有皇天爲吐氣  
豈無青史更誅姦字留陳迹何年泯烟鎖空山盡日閒  
世事關心眠不得今朝下涕爲潛潛

兒時曾住練江頭長老頻頻說岳侯手握天戈能決勝



心輕人爵祇尋幽堪嗟燭火當時滅誰信長川萬古流  
機會莫言今到手卻愁無飯飽貔貅  
背鬼軍馬戰無儔歷盡當年幾列侯先輩有聞多散軼  
後生誰識發潛幽傷心咄咄權臣事滿眼滔滔債帥流  
槌剥到今渾似鬼向人休說是貔貅

詠東松庵

作意東松訪舊聞山巖窟裏梵宮存矮樓蛙井身如蝨  
峭壁魚鱗手可捫草草反成多景致慳慳別是一乾坤  
輸他飽飯安眠處朝暮烟霞看吐吞

褒三湯孝行

誰道田家不讀書一門孝行與人殊直將自己通天地  
豈是無心惜體膚人願生兒皆似此神如祐善肯忘吾  
勉哉一念勤推廣已辦嘉名里巷呼

讀朱冠之詩有作三首

孔孟宗師心中的回由評品手持衡至剛大勇本來有  
由義居仁熟處行說到孤忠推自孝輒拌一死肯偷生  
此篇此語令人醒夜半青燈看到明

浮雲孽破月華明怎得浮雲不再生幾度月明雲幾孽

全無雲翳月全清後生欲解憑誰問先覺雖知肯盡鳴  
苦硬工夫須徹底秋雲漠漠一輪橫

多言外好中何有有德之言春意融惟一性天真洞徹  
許多事理盡流通句新悅耳源先涸思苦雕肝味易窮  
自古才人皆患此就中崛強是揚雄

題趙氏連理木圖

連理呈祥炳寸丹巽齋高致拂雲端須知念念通冥漠  
不見聲聲說急難義槩莫如生死際家風要使子孫看  
城南我祖嘉名似從此心期共不刊

五言絕句

留無邪字 名天駿

此駿產渥洼神奇莫浪誇相期千里志贈子字無邪

遊敬亭山用謫仙韻二首

黃蘗道場古裴公心事閑白詩三絕併那似敬亭山  
事從塵世去心共白雲閒不作遊山計朝朝飽看山

七言絕句

衢學講堂更名時習和貳車韻五首

道心無壞亦無成只怕微雲點太清重坎之亨人不識

一輪素月本來明原註言習坎之心亨也

意味澄然未動初綱常大道本同趨直須麗澤工夫熟

便是當年詠舞雩原註言兌澤之講習也

終身不察是凡人一日三回省此身參也親傳端的處

品題宜亞不違仁原註言曾子之傳習也

緬懷周道意悠長事業姬公念不忘宗廟百官誰識者

仲由也只許升堂原註言孔子之習周公也

莫道今人不古如分明氣象魯之洙坤爻六二知何義

試叩膠庠學易徒原註言坤六二之不習無不利也

再用前韻

瑚璉區區只小成休言果藝與忠清聖師忘食兼忘老地久天長日月明

修慝之餘德復初更須辨白舍并趨善哉三語當年問直到于今想從雩

兩地參天命曰人靈龜端合取諸身笑渠到處閒尋覓直信人言井有仁

逝者如斯晝夜長會心能使百憂忘生前身後渾如此絲竹之音孔子堂

小時所學老何如自詫西河不記洙曾子斯言譏背本

祇今猶足警吾徒

原註事見檀弓時習學也借以論政政與學豈有二哉

再用前韻

逾年政化一無成敢道民和獄訟清不以旁人評得失

箇中一點自知明

心事如何忍負初官居每憶過庭趨勤勤撫字今微驗

雨足春疇不待雩

誠心諭俗淑斯人莫寶金珠寶此身昨日偶拈鄉記看

幾家孝養漸興仁

吾儒政事話頭長步步詩書可斲忘齊相未知真不擾

無端遜與蓋公堂

蒲盧喻政意何如此語源流亦自洙若願小民皆類我

須知類我始生徒

時習堂記言五典也載賡前韻以歌之

事親盡孝自天成鑑本無塵水本清相彼禽兮猶學習

靈鳥反哺更分明

習容齋戒適朝初佩玉鏘鳴謹進趨

原註玉藻將適公所宿齋戒習容觀

玉聲大分凜然冠履判一誠不散若郊雩

原註左氏啓蟄而郊龍見而雩

齊家斷勿責他人須信儀型只在身習習谷風譏義薄  
交相愛也是為仁

徐行後長味深長此道誰能篤不忘我欲講行鄉飲酒

大明上齒習斯堂

原註王制習鄉上齒

切偲取義思怡如兌習工夫憶泗洙泮水朋來方袞袞

三千攀附聖門徒

再和特習五章章取禮記一句

復禮工夫本易成此心對越只寅清居鄉上齒家常飯

此道于今晦不明

右王制習鄉上齒

蓬矢桑弧男子初澤宮試事翼如趨采蘋盈耳皆音節

原註凡射士以采蘋為節盛樂何消待大雩

原註月令大雩帝用盛樂

右射義習射于澤

鷹猶知學況于人羽翮冲霄具此身須信數飛方解熟

熟之又熟即為仁

右月令鷹乃學習

佩玉之聲清越長此身無故詎容忘

原註君子無故玉不去身挈渠

方履圓冠士登我光風霽月堂

右玉藻習容觀玉聲

聖道洋洋滄海如不流天下只流洙上丁釋菜今非古  
喚起遺風屬我徒

右月令上丁習舞釋菜

壽趙處仁母夫人

有序

甫將江東使指詣學講孝經作勸孝之詩訓里  
巷屬部民有高年者旌異之惟恐後番陽法曹  
趙處仁入憲幕清介敏于事堂有九表慈母而  
未加禮敬寧非大闕甫敢述小詩介薄儀以爲

夫人壽

有子見知真西山有孫又把桂枝攀堂前萱草年年綠  
慶事天公定不慳

壽張亨之祖母夫人

有序

張亨之雙親皆康寧祖母夫人今年慶九表闔  
門怡愉士林羨慕亨之壯年掇儒科以東流簿  
入幕敏而好修助荒政有勞名聞于朝矣慈顏  
應少慰乎甫敢歌小詩將薄禮亨之其持以壽  
夫人

爲問蟠桃熟幾番見兒髮白著衣斑孫枝又作紅蕖客  
更願雲初捧壽山

壽馮德厚三首

人生汨汨逐風波祝子長年要若何一日洞然無障礙  
元來佛法也無多

麟經咀嚼造深微攀取秋風第一枝便把斯言爲子壽  
崧高不用更吟詩

朱絃疏越澹徽音身在塵中只古心祝子長年仍健飯  
好書讀到夜沈沈

賡周純甫求歸三首

秋風一夜簸清波我自思親奈客何遠地少書消息好  
書多愁悶轉添多

苦過重陽賦式微黃花賸插兩三枝對花酬酒堅盟約  
依舊黃山唱和詩

人生何處是知音契合端由一片心瞥見先生清苦貌  
吾兒且喜不埋沈

再用前韻

山未烟雲水未波試參妙處定如何黃花未見應難會

見了黃花會意多

本是塵中詩興微秋風偶折最高枝詩壇方築那言去  
為我留連百首詩

百首詩成遇賞音云何容易動歸心少陵不肯為輕薄  
笑殺王楊井底沈

送別再用前韻

歛江歸艇棹晴波同去同來日幾何不怕黃花負人約  
只愁人意負花多

鳳凰翔集肯卑微獨向梧桐揀一枝乍別故棲知未忍

臨行更賦白圭詩

慇懃寄信勝郵音合把君心印我心老老及人仁者事  
祝君毋得任浮沈

和晉齋兄韻三首

不愛金章紫綬紆欣然玉局自安居近來作計誰云拙  
六六之年創一廬

不羨勲名逐日新課孫種績及青萍試將圓鏡當空照  
始識廬山面目真

家塾提綱屬晉齋絜齋氣脈遠乎哉何時升講開聾聵



蒙齋集 卷三 谷際岐校  
衿佩蹒蹒濟濟來

送番陽程令出鄉行古問百年禮

黃柏岡前百歲翁  
婆娑終日酒杯中  
此行得得煩君問  
荒政如今愜老農

題半霄亭

今朝帶月上山頭  
面面晴嵐翠欲流  
此處青霄纔是半  
半霄以上許登不

龍女泉

靈泉何事迸幽巖  
龍女分從萬丈潭  
一勺之多龍在否

煩君試向此中參

崇聖寺瀑布泉二首

占來翠瀑僅涓涓  
夏玉新亭卻沛然  
世事廢興皆若此  
醉眠何用問青天  
半山飛瀑元如雪  
況是今朝雪裏來  
界破青山休謾詫  
神光妙用亦奇哉

九華山

天河秀出九芙蓉  
白也詩詞信是工  
我欲依然名九子  
人情山意兩融融

和趙克宗三洞天二首

洞外老天非不大洞中天小卻奇哉此奇端的由天造  
不枉攜朋得得來

自昔堯湯水早年祇緣先備國無捐我今燭火區區甚  
慚見容光照洞天

九芙蓉峯

眼底山光半有無芙蓉面目定何如忽然皓月當空掛  
始信山靈不負予

莫能名庵二首

說道空空元不空太空何物不能容世人枉被虛名幻  
到底還須識正宗

青山突兀倚長空不作人間兒女容幾載無名茅處士  
一朝識破有林宗

東松菴

六月山泉定易枯枕流洗耳事何如幽人高臥渾無惱  
好把靈源日日疏

詠裴休捨宅爲寺

我憐裴相愛參禪石上蓮花幾刻鑄捨宅何如休起宅

蒙齋集 卷三 鄴侯師儉是名言

題象山先生帖

誼重姻聯語甚真典型滿紙墨猶  
間多少箴規意  
須信親親卽是仁

索新進詩

君傳祕訣解觀人瞥見雙眸識破真收拾後生知幾許  
爲予喚取儻相親

趣諸友觀牡丹

天工不管國香奇流落民家識者希特地邀賓賓不至

國香也是少人知

和魏都大牡丹二首

初放姚黃一兩枝旋看魏紫格尤奇天公似欲留連住  
伴我醪醑滿架時  
費盡工夫始盛開一時賞玩四  
培東君摧折飄零後  
猶帶天香溪上來

映山紅

山花無數笑春風臨水精神迥不同喚作映山風味短  
看來恰似映溪紅

蟠梅二首

籬外橫斜只任真無端束縛損花神孤標自是爲人妒  
一笑春風不用嗔

幸自塵埃不許侵千盤萬結戲和尋只緣漏泄春消息  
惹動旁人機巧心

見梅

半月山行不識梅近城纔見一枝開呼童截竹敲冰水  
盛取數枝隨轎來

元夕留城外

三市香塵隘綺羅遊人無奈月明何吾儂分得寬閒處  
地闊天高得月多

憩折山市

折山山下簇人煙一似吳兒笑語喧始信臙脂溪水媚  
木瓜分得也嫣然

耕樂詩四首

優游無事只耕田顧我歸耕子  
但千倉良足樂  
不收一粒亦欣然

一犁春雨趁晨耕歌咏康衢了此生若有可憂方有樂

本無虧處亦無成

一片靈明自有田當仁那肯遜儒先歸來不說溪山好

只說癯仙氣浩然

少時操筆代躬耕老鶴如今太 生仁識箇中真樂地

誰云骨相費生成

蒙齋集卷三



